

**Naša stranka**  
**Manifest**  
**Sarajevo 10/06/2023**

Naša stranka je socijalno-liberalna stranka s vizijom Bosne i Hercegovine kao sekularne zemlje utemeljene na evropskim vrijednostima parlamentarne demokratije, pravde i antifašizma te potpunog uvažavanja i očuvanja vlastite unikatne multikulturalnosti i kosmopolitizma.

U fokusu te vizije je prije svega pojedinac, građanin i građanka, koji u svojoj historijom i resursima bogatoj zemlji slobodno ostvaruju sve svoje individualne potencijale pri čemu su podržani od socijalne države; države koja je u potpunosti u službi građana, njihovog blagostanja i prosperiteta, s primarnom zadaćom da im jamči slobodu uvažavajući njihove etničke, rodne, socijalne, vjerske, političke ili seksualne osobnosti.

Da bi omogućili stvaranje ambijenta koji bi izvukao našu zemlju iz kleptokracijskih težnji kojima nažalost svjedočimo već predugo vremena, pri tome gubeći neprocjenjivu demografsku supstancu, Naša stranka će nastaviti beskompromisnu borbu protiv korupcije, kriminala i klijentelizma stvarajući pravedno društvo bazirano na meritokraciji koja neće zavisiti od hirova političkih lidera, nego kapacitiranih institucija sistema.

Takva država, odnosno njeno društvo mora osigurati pravo na rad svakog pojedinca, zaštititi njegov/njen dignitet te istovremeno stvoriti solidno poslovno okruženje za sve one koji investiraju ili bi željeli investirati u našu zemlju.

Ekonomski napredak koji se temelji na dobrim i vrijednim ljudima naše zemlje mora biti potpuno i organski usklađen s brigom prema okolini i prirodi, čije resurse moramo koristiti s mjerom i sviješću da će njihovo trajanje, ljepota i korist zavisiti isključivo od nas samih.

Svijest o vlastitoj slobodi te potencijalima i mogućnostima naše zemlje koju vidimo u ujedinjenoj Evropi neće biti moguća ako ne budemo izgradili obrazovni sistem koji se neće baviti brojanjem krvnih zrna naše djece, podijeljenim školama i sumnjivim fakultetima, nego osposobljavanju naših mladih da usvoje i osvoje kompetencije s kojima će sutra biti regionalni i svjetski lideri u svojim zvanjima.

Nažalost, vladajuće nacionalističke političke i ine oligarhije su se decenijama takmičile u ubjeđivanju Bosanaca i Hercegovaca o nemogućnosti zajedničkog života, istovremeno manifestirajući idilično zajedništvo u dijeljenju plijena, tj. zajedničke imovine svih građana naše zemlje, a sve u skladu sa svojim zamišljenim etničkim torovima.

Njihovo vrijeme upravo ističe, a naša zemlja koja ima rijetku privilegiju da može kapitalizirati najbolje od kultura, (i ne samo kultura), i Istoka i Zapada, dobiva novu šansu da pokaže da može i mora puno bolje.

Vrijeme isprazne retorike nacionalističkih i pseudograđanskih kvazilidera čiji se politički narativ bazira isključivo na militantnoj, antagonizirajućoj matrici ne može više biti njihovo pokriće za nerad, kriminal i pohlepu.

Njihov bajati, ali opasni poduhvat mora doživjeti krah, a mi moramo omogućiti da se više nikad ne ponovi.

Pozivamo sve građane naše zemlje, koji je istinski vole i s nama dijele liberalne vrijednosti za koje se zalažemo, da nam se pridruže i da nas podrže. Samo se ujedinjeni kao slobodni građani i građanke možemo izboriti za njih.

**ŽIVJELA SLOBODA!**